

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 458231 24 St
Tuzla, 02.10.2025. godine

Općinski sud u Tuzli, sudija Antonela Đaković, kao stečajni sudija, u stečajnom postupku nad imovinom stečajnog dužnika Robna kuća „Domaćinstvo“ d.o.o. Tuzla – u stečaju, dana 02.10.2025.godine donio je sljedeće:

RJEŠENJE

ZAKLJUČUJE SE stečajni postupak nad imovinom Robna kuća „Domaćinstvo“ d.o.o. Tuzla – u stečaju, zbog nedovoljnosti stečajne mase.

Stečajni upravnik se ovlašćuje da i nakon zaključenja stečajnog postupka može provoditi sve prave radnje na naplati svih troškova postupka po pravosnažnim presudama broj: 32 0 Ps 467946 24 Ps i 32 0 Ps 467948 24 Ps, kao i završiti sve aktivnosti oko primopredaje arhivske građe i troškova prema Arhivu Tuzlanskog kantona.

Rješenje o zaključenju stečajnog postupka objavit će se u „Službenim novinama FBiH“ i na oglasnoj ploči ovog suda.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Tuzli, radi brisanja stečajnog dužnika iz sudskog registra.

Obavještavaju se stečajni dužnik i stečajni upravnik da pravne posljedice zaključenja stečajnog postupka nastupaju 8 dana od dana objavljivanja ovog rješenja u „Službenim novinama FBiH“.

Obrazloženje

Rješenjem ovog suda, broj gornji, od 24.04.2024.godine otvoren je stečajni postupak nad imovinom dužnika Robna kuća „Domaćinstvo“ d.o.o. Tuzla – u stečaju.

U toku stečajnog postupka održana su dva ispitna ročišta na kome su ispitane prijave potraživanja kao i naknadne prijave, a ukupno prijavljena potraživanja iznose 3.154.876,50 KM od kog iznosa je osporeno 1.096.793,12 KM, a priznato kao razlučno pravo 2.058.083,38 KM. Ukupno priznata potraživanja koja se odnose na razluče povjerioci iznose 1.365.171,61 KM, viši isplatni red je priznat u iznosu od 30.936,94 KM, opći isplatni red u iznosu od 650.387,09 KM, a niži isplatni red 6.597,74 KM.

Postignuta kupoprodajna cijena za jedinu nekretninu stečajnog dužnika označenu kao kč.br. 286/2 i 286/3 KO Tuzla iznosi 795.098,87 KM, a priznati iznos razlučnog prava povjeriocu Addiko bank d.d. Sarajevo iznosi 895.583,06 KM, a da je unovčena imovina za iznos od 795.098,07 KM. Nakon umanjenja postignutog iznosa kupoprodajne cijene za troškove stečajnog postupka, razlučni povjerilac Addiko banka d.d. Sarajevo namirena je u procentu od 88,77%.

U pogledu ukupno priznatog razlučnog prava svim povjeriocima u ovom stečajnom postupku procenat namirenja razlučnih povjerilaca iznosi 58,24 %, dok za povjerioce višeg, općeg i nižeg isplatnog reda nije bilo dovoljno stečajne mase iz koje bi bili namireni.

Iz izvještaja stečajnog upravnika-prijave nedovoljnosti stečajne mase od 05.09.2025. godine slijedi da stečajni dužnik nema druge imovine koja bi ušla u stečajnu masu i koja bi se dalje unovčavala.

Na osnovu odredbe člana 197. Zakona o stečaju FBiH, stečajni upravnik je, imajući u vidu da nema stečajne mase iz koje bi se namirila bar djelimično prijavljena i priznata potraživanja, dana 05.09.2025.godine prijavio nedovoljnost stečajne mase.

Sud je rješenjem od 22.09.2025.godine, a koje je objavljeno u "Službenim novinama FBiH" broj: 75/25 od 01.10.2025.godine, javno objavio prijavu nedovoljnosti stečajne mase, a na osnovu odredbe člana 197. stav 3. Zakona o stečaju FBiH (Službene novine broj: 53/2021).

Odredbom člana 200. stav 1. Zakona o stečaju propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a stavom 2. istog člana je propisano da je stečajni upravnik dužan za svoj rad, nakon prijavljivanja nedovoljnosti stečajne mase, posebno da položi račun stečajnom sudiji. Pored navedenog odredbom člana 200. stav 3. istog Zakona propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija će na prijedlog stečajnog upravnika, povjerioca stečajne mase ili po službenoj dužnosti odrediti naknadnu diobu. U ovom slučaju se na odgovarajući način primjenjuju odredbe člana 192. stav 3, i člana 193. i 194. ovog Zakona. Također stečajni upravnik se ovlašćuje da i nakon zaključenja stečajnog postupka može provoditi sve prave radnje na naplati svih troškova postupka po pravosnažnim presudama broj: 32 0 Ps 467946 24 Ps i 32 0 Ps 467948 24 Ps, kao i završiti sve aktivnosti oko primopredaje arhivske građe i troškova prema Arhivu Tuzlanskog kantona.

Obzirom da stečajni dužnik nema imovine čijim bi se unovčavanjem namirila potraživanja povjerilaca, osim za pokriće troškova stečajnog postupka, to je sud shodno odredbi člana 200. Zakona o stečaju zaključio stečajni postupak i odlučio kao u izreci rješenja.

Prema odredbi člana 204. stav 1. Zakona o stečaju (Službene novine FBiH broj: 53/2021) rješenje o zaključenju stečajnog postupka objavljuje se u „Službenim novinama FBiH“, web stranici Općinskog suda u Tuzli i oglasnoj tabli suda.

Pravne posljedice zaključenja stečajnog postupka nastupaju 8 dana nakon objavljivanja rješenja u „Službenim novinama FBiH“, a sve shodno članu 204. stav 3. Zakona o stečaju FBiH.

Odluka o brisanju pravnog lica iz javnih registara zasnovana je na odredbi člana 204. stav 5. Zakona o stečaju FBiH.

**Stečajni sudija,
Antonela Đaković**

POUKA: Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 (osam) dana, od dana objave rješenja u „Službenim novinama FBiH“.